



Акафист

святому преподобномученику

Макарию, архимандриту

Каневскому

Кондак 1

Избранный от Бога угодниче и страстотерпче Христов, преподобномучениче Макарие, источаяй миру многия милости и чудесная дарования! Похвальная восписуем ти, почитающе святую память твою. Ты же на Небеси предстоя Престолу Господа Славы, молися о всех нас, с верою притекающих к тебе и любовью зовущих: Радуйся, преподобномучениче Макарие, Переяславский и Каневский чудотворче.

Икос 1

Ангела земнаго и человека Небеснаго яви тебе от утробы матери всего мира Создатель: ты бо, блаженне Макарие, еще во отроческих летех пребывая, земная веселия вся презрев,

попечение о благочестии имел еси, ко храму Божию прилежа и ревнуя о учении и познании веры Православныя. Мы же, дивящися сему, вопием: Радуйся, родителей благочестивых мудрый сыне. Радуйся, от утробы матери Духом Святым осененный. Радуйся, от младенчества Богом избранный. Радуйся, от юности Христа возлюбивый. Радуйся, подвижниче, Божиею благодатию прославленный. Радуйся, многия скорби и мучения за имя Христово претерпевый. Радуйся, прекрасный плоде древа райскаго, Духом Святым возвращенный. Радуйся, избранниче Христов, с Нимже ныне и царствуеши во веки. Радуйся, преподобномучениче Макарие, Переяславский и Каневский чудотворче.

Кондак 2

Видяще любовь твою к молитве и попечение, како угодити Богу, отец и матери и сродники твоя не прещаху, но паче споспешествоваху ти возрастати в разуме Божии и добродетели. И промыслиением Божиим тако совершися, яко егда в земли твоей времена тяжкая для веры Православныя насташа, великий подвижник и

поборник Тоя явился еси, да вси вернии воспоют Богу: Аллилуиа.

Икос 2

Разум несомненный дарова ти Христос, Божия Сила и Божия Премудрость, егда ты, отче Макарие, Моисею Боговидцу подражая, в годину тяжкую восхотел еси паче страдати с ревнители веры Православныя, неже привременныя греха сладости ради уклонитися ко прелести нечестия; сего ради мы грешнии, похваляюще таковое твое дерзновение по Бозе, умиленно вопием ти: Радуйся, душу твою сохранивый и освятивый ю светом Христовым. Радуйся, крест скорби и терпения за Христа в сердце своем водрузивый. Радуйся, верное и послушное чадо Божие. Радуйся, славный проповедниче Православия. Радуйся, сострадательно внимлющий гласу страждущих. Радуйся, отрадо к тебе притекающим. Радуйся, ухо твое не отвративый от вопля и рыдания страждущих. Радуйся, отверзый сердце твое спострадати скорбем и болезнем угнетенных. Радуйся, преподобномучениче Макарие, Переяславский и Каневский чудотворче.

Кондак 3

Силою Божию укрепляемый и просвещаемый, пламенне возжелел еси, досточудне Макарие, по кончине отца твоего и матери всего себе вдати Господеви; того ради, славу тленного мира всю презревши, притекл еси во Овручскую обитель и тамо чин Ангельский прием, воспел еси Христу Богу: Аллилуиа.

Икос 3

Имея попечение об угождении не людям, но Богу, егда приял еси иноческий чин, блаженне Макарие, мнозе поучался еси в словесех Писания Божественнаго и Святых Отец творений, добре любяй Святаго Златоуста письменна; и был еси удостоен благодати священства и власти поставляти и поучати иноки. Мы же, ведуще веру твою во Христа Спаса пламенну и мудрость великую, ублажаем звании сими: Радуйся, смирения, кротости и воздержания учителю. Радуйся, воине Христов непобедимый. Радуйся, плотския похоти Бога ради умертвивый. Радуйся, пощением и молитвою, трудом и послушанием Богу угодивый. Радуйся, иноков похвало и достойный

собеседниче Ангелов. Радуйся, яко тобою благодати Божия вернии исполняются. Радуйся, от юности иноческим обетом предавый Господеви чистое сердце твое. Радуйся, умертвивый похоти и страсти постом и молитвою. Радуйся, преподобномучениче Макарие, Переяславский и Каневский чудотворче.

Кондак 4

Бурю внутри имеяй помышлений сумнительных, вначале отрелся еси, Макарие, правити обителию Овручскою, обаче егда братия гневахуся на тя и суд Божий представиша ти, аще не восхоцещи правити обителию в тяжкую годину искушений и бед, ты, блаженне, предав себе воли Господни, приял власть, поюще со всеми Богу: Аллилуиа.

Икос 4

Слышавше и видевшe святое житие твое, понеже наставник великий монахов был еси, учаще оныя, такожде и мирския люди словом и делом, како надлежит во благочестии жити, приходиша к тебе ближнии и дальнии послушати словес твоих и житию

добродетельному учиться. Молим тя, блаженне Макарие, научи христианскому житию и нас, грешных, вопиющих ти таковая: Радуйся, сосуде, благодати Божия изобильно исполненный. Радуйся, добрый делателю винограда Небеснаго. Радуйся, мудрый сеятелю благочестия. Радуйся, великий наставниче заблуждших. Радуйся, скорый помощниче страждущим. Радуйся, Ангеле, во плоти миру явленный. Радуйся, стада Христова добрый и кроткий пастырю. Радуйся, яко научивый и сотворивый, и великим нареченный в Царствии Небеснем. Радуйся, преподобномучениче Макарие, Переяславский и Каневский чудотворче.

Кондак 5

Боготечней звезде уподобился еси, отче Макарие, егда, показуя людем путь твердый, ко Господу ведущий, в день, воньже нечестивии агаряне нападоша на град Овруч, ты теплою молитвою, исшед с братиею со святыми иконами, отгнал еси враги от града; и тии возмневше, яко полк зело мног на них ополчися, в бегство обратишася. Чудесно же спасеннии благодарственно воспеша Богу: Аллилуиа.

Икос 5

Видевше тя хранителя тверда веры
Православныя, врази твои, книжником и
фарисеем древним подобящися, совет
нечестивый сотвориша уловити тя и совратити с
пути праведнаго. Посрамлени же быша, дышуще
злобою, помышляху всячески о разорении и
искоренении обители твоея; вскоре же агаряне,
паки нашедше, разориша вконец и обитель
твою. И ты, поруган зело, отшел еси подвизатися
в Киево-Печерскую Лавру. Таковыя ради твоея
ревности о Господе Вседержителе, вопием ти,
святые Макарие, сице: Радуйся, поборниче
Христов, в мужестве неодоленный. Радуйся,
советом нечестивых не покоривыйся. Радуйся,
непоколебимый столпе Церкви Христовы.
Радуйся, щите веры, притупивый стрелы
лукавых. Радуйся, молние, разгоняющая враги
видимыя и невидимыя. Радуйся, звездо, путь ко
Христу показующая. Радуйся, препоясавый
чресла твоя истиною. Радуйся, молением
поражающий врагов Церкви Христовой.
Радуйся, преподобномучениче Макарие,
Переяславский и Каневский чудотворче.

Кондак 6

Проповедницы быша твоего непоколебимаго стояния в вере Христовой иноцы, мирстии и святителие, видяще, яко уподобился еси розе среди шипов невредимо растущей, понеже врази, аще и тщахуся, не возмогоша погубити святости и благоухания в Тебе Божия. Мы же, величающе тя, яко преизящный крин Христов, вопием прославльшему тя Господу: Аллилуиа.

Икос 6

Возсиял еси дивным светом жития твоего и борения за веру Православную, отче Макарие, и сего ради якоже во Овруче граде был еси начальник обители, таковым поставлен был еси и во граде Каневе, и zde паки начаху приходити к тебе ближнии и дальнии учиться, како во Христе жити и зло побеждати со упованием на Господа. Ты же был монахом и мирским, яко отец чадом; и нам, грешным, наставник великий являешия, вопиющим ти: Радуйся, скорбящих и обуреваемых приятное утешение. Радуйся, изнемогающих тихое пристанище. Радуйся, заступниче вдов, сирот, немощных и убогих. Радуйся, защитниче обидимых и гонимых. Радуйся, истиннаго Богопочитания

насадителю. Радуйся, яко добрая дела твоя сияют на тверди Небесней. Радуйся, многоценное миро любви Христовы, источаемое независтно всем притекающим. Радуйся, мудрый делателю винограда, егоже насади десница Господня. Радуйся, преподобномучениче Макарие, Переяславский и Каневский чудотворче.

Кондак 7

Хотяй путеводити люди ко спасению, якоже повелевают уставы Церковнии и совесть Христианская, в годину скорби учил еси, отче Макарие, яко скорби нуждни суть нам, еже святой Златоуст рече, понеже скорбьми велики подобает внити в Царство Небесное; ревностию же по Бозе пламенеючи, молил еси сильныя о покровении Церкви Православныя, да вси чада ея воспоют Богу: Аллилуиа.

Икос 7

Новую показа милость рабом Своим Спас мира, Христос Господь, тобою, отче Макарие, егда ты, внимая слезам некия жены благочестивыя, обратил еси ко Господу нерадиваго и неблагонаправнаго сына ея, кротце

научил онаго творити молитву Господню, и чтение тоя прилежное возроди душу человека сего. Мы же, такового ради деяния твоего, умиления исполнени, зовем ти та ко: Радуйся, падающих возводяй любовью ко Христу. Радуйся, заблуждших исправление от путей беззаконных. Радуйся, благодатный врачу немощных. Радуйся, прозорливче Божий, тайная ведый человеческая сердца. Радуйся, мечу, посекаяй всяку неправду и беззаконие. Радуйся, неотступный обличителю грешников духом кротости и милосердия. Радуйся, многих на путь истинный наставивый. Радуйся, вразумление нерадивых и неблагонаправных. Радуйся, преподобномучениче Макарие, Переяславский и Каневский чудотворче.

Кондак 8

Странное и славное явление силы Божия видеша на тебе чада Церкви Христовы: твоими бо молитвами слепии прозреваху, бесы изгонишася, болящия от одра вставаху. Того ради мы, прославляюще тя, Макарие, яко Врача душ и телес наших - Христа - вернаго служителя, вопием: Аллилуиа.

Икос 8

Весь был еси помышлением твоим в вышних, сего ради и люди ревностне учил еси, како угождати Богу словесы и дела, грешныя же обличал еси, да покаются; в нихже научил еси жити; благочестно судию некоего, во граде живуща, мздоимца и неправедно суд людем творяща, сему тайно в субботы посылающе пенязи и краткия письма увещания. И егда уведо от тебе судия, яко последняя отдавши, раскаяние и исправление яви. Молитвами твоими, Макарие, помози и нам к покаянию обратитися, зовущим ти: Радуйся, непрестанное о людех имый промышление. Радуйся, неверных на путь истины приводяй. Радуйся, неправо судящих грозный обличителю. Радуйся, праваго пути светило светозарное. Радуйся, сокровище многообразных дарований Животворящего Духа. Радуйся, человеке Божий, грады и веси исполнивый славою добрых дел твоих. Радуйся, неотступный обличителю неправды. Радуйся, ищущий бисеров плодами веры и покаяния. Радуйся, преподобномучениче Макарие, Переяславский и Каневский чудотворче.

Кондак 9

Все естество Ангельское срадуется и свеселится Спасу Христу, зряще тя, блаженне Макарие, данный Ти от Господа талант возрадивша: ты бо, расточая стяжания твоя нищим и убогим, от нетленного богатства духовного питал еси вся приходившия к тебе, тщая всячески, да отложат вернии ветхаго человека с деяньми его, в новаго же облечутся, обновляемаго по образу Создавшаго его, в разуме поюще Богу: Аллилуиа.

Икос 9

Ветии многовещанная не возмогут достойно славить дела твоя великая: ты бо еще в житии твоём, Спасу тя прославляюще, удостоен был еси от Господа дара прозрения, еже быти имать в летех грядущих. Тако предрекл еси разорение от врагов града Канева и обители твоея, беды лютыя и смерть многих; и увещавал еси братию николиже отпадати от веры, но верными даже до смерти Христу пребывати. Прославляюще твое о Господе мужество, Макарие, вопием ти: Радуйся, правило веры и ревности благочестивыя. Радуйся, древо, плодами благочестия украшенное. Радуйся, велию власть

на диавола от Господа получивый. Радуйся, сподобивыйся от Бога дара прозрения будущих. Радуйся, верных твоих уготовавый ко дню воцарения со Христом в жизни вечней. Радуйся, подвигнувый чада твоя мужески терпети вся за имя Христово. Радуйся, душ наших радование. Радуйся, яко тобою сладостей духовных исполняемься. Радуйся, преподобномучениче Макарие, Переяславский и Каневский чудотворче.

Кондак 10

Спаستися и в разум истины прийти всем человеком хотящу Спасу работая, егда час нашествия врагов на землю Украинскую и град Канев уже наста, повелел еси братии уготоватися к исходу от жития сего земнаго пощением и причащением Святых Тайн. Все же послушавше тебе, воспеша Богу: Аллилуиа.

Икос 10

Стена явился еси братии обители твоея, Макарие, и всем верным во граде Каневе, егда врази сокрушивше врата обители и сокровища монастырския ищуще, изведоша тя вон и поруганию и избиению предаша. Вернии же

людие со слезами: Отец наш! Отец наш!, -
вопяху гласом. Ты же агаряном нечестивым
рекл еси, отче: не на земли, но на Небеси
Сокровище мое есть. Врази же злобою на тя
ярящися, отсекуше главу твою, отъидоша. Моли о
нас, мучениче Христов, да помянет во Царствии
Небеснем Спас нас, якоже разбойника
благоразумнаго, почитающих страдания твоя и
зовущих ти: Радуйся, Господа прославивый
подвиги твоими. Радуйся, страстотерпче
Христов, молитвою и Крестом мучителей
посрамивый. Радуйся, дух твой Господу
предавый во глас любви к тебе верных. Радуйся,
вольная страдания за Христа претерпевый.
Радуйся, уничиженный и поруганный на земли.
Радуйся, славою и честью украшенный на
Небеси. Радуйся, усекновение главы твоея от
агарян приявый. Радуйся, убеливый ризы твоя в
крови Агнчей. Радуйся, преподобномучениче
Макарие, Переяславский и Каневский
чудотворче.

Кондак 11

Пение всеумиленное принесоша ти града
Канева обитателие, имже судил есть Господь по
отшествию нечестивых агарян живыми остати,

егда пришедше на место, идеже стояше сожженный агаряны храм обители, и не нашедше останков сродник своих, обретоша токмо честное без главы тело твое, во власяницу одеяно и со Крестом в руце, и погребению честному предаша на месте, идеже стояше жертвенник, поюще Богу: Аллилуиа.

Икос 11

Светильник горяй и светяй был еси в житии твоём земнем, блаженне Макарие, и таковым и поныне всем верным являвшемуся, и сие узреша людие Православнии, егда десятилетию минувшу по разорении града Канева, обретени быша честныя мощи Твоя и поставлени в новоустроенном храме обители, и тамо мнози чудеса источиша; такожде бысть и по пренесении мощей твоих во град Переяславль. Прославляюще тя, отче, яко помощника в скорбех и бедах наших, вопием ти: Радуйся, пресветлый светильниче, возсиявый на тверди Небесней. Радуйся, в немерцающем свете с Господом пребываяй. Радуйся, зрящий Господа Вседержителя на Небеси. Радуйся, унаследовавый вечныя радости в Царствии Небеснем. Радуйся, исцелений благодатный

источниче. Радуйся, о спасении душ наших великий молитвенниче. Радуйся, псаломски вопиявый от сих ко Господу: не убоюся зла, яко Ты со мною еси. Радуйся, неверных страх и посрамление, венец исповедника Христова стяжавый. Радуйся, преподобномучениче Макарие, Переяславский и Каневский чудотворче.

Кондак 12

Благодать дарова ти обильную Христос Бог наш, святе Макарие, во еже путеводити люди ко спасению. И ныне источают оную честныя мощи твоя, недугующия душею и телом исцеляя. Поклоняющесе им с верою, вопием ти: Предстательством Твоим у Спаса Христа помози нам, преподобномучениче, благочестно на земли пожити, да и Царствия Небеснаго сподобимся, поюще Богу: Аллилуиа.

Икос 12

Поюще труды и подвиги твоя, преподобномучениче Макарие, прославляем Дивнаго во святых Своих Господа, ублажаем мученическую кончину Твою, и ведуще тя, яко Ангела во плоти на земли, Спасу благоугодивша

и вольная страдания на Него претерпевша, и яко заступника великаго пред Престолом Господним за люди Православныя, из глубины души в похвалу тебе вопием: Радуйся, дивное сияние истины Евангельския. Радуйся, великий предстателю бедствующим в море житейстем. Радуйся, благодатный утешителю всех славящих имя твое. Радуйся, скорый послушнице всех с верою призывающих тя. Радуйся, теплый ходатаю у Престола Господня о всех, чтущих святую память твою. Радуйся, Небесный покровителю страны нашея, града и храма, идеже почивают святыя мощи твоя. Радуйся, исповеднице веры во Христа неустрашимый. Радуйся, воине Христов непобедимый. Радуйся, преподобномучениче Макарие, Переяславский и Каневский чудотворче.

Кондак 13

О, пресвятой и пречудный угоднице Христов, преподобномучениче Макарие, прими от нас малое моление сие наше, сердцем и устами в похвалу тебе приносимое, и умоли Христа Бога, да направит нас всемогущею силою Своею к житию праведному, и да удостоит деснаго

стояния на Страшнем Судици Своем, радостно поющих: Аллилуиа, Аллилуиа, Аллилуиа.

(Этот кондак читается трижды, затем икос 1 и кондак 1)

Молитва

О преславный преподобномучениче Макарие, скорый помощниче и теплый заступниче всех, притекающих к тебе, предстательством своим пред Господом умоли Спаса нашего, да обратит души наша к покаянию и исправлению, да дарует мир отечеству нашему и всей земли и да поможет всем нам твердыми быти в вере Православней и делех благих, да отженет от нас дух злобы и лукавства, и братолюбие вселит в нас, и да приносим во всем житии нашем плоды духовныя: любовь, благость, милосердие, веру нелицемерную, кротость и воздержание, и да, распявше на земли плоть нашу со страстьми и похотьми и духом живуще и ходяще, сподобимся жизни вечныя в веце грядущем, и, райския сладости присно наслаждающесе с тобою и со всеми святыми, прославим Отца, и Сына, и Святаго Духа, ныне, и присно, и во веки веков. Аминь.